

**2025-mut Nunatta Karsiata naatsorsuutaata akuersissutigineqarnissaannik siunnersuut**  
(Aningaasaqarnermut Naalakkersuisoq)

**Saqqummiussissut**

**Siullermeerinnineq**

Naalakkersuisut sinnerlugit ukiumut aningaasanut inatsiseqarfiusumut 2025-mut Nunatta Karsiata Naatsorsuutai matumuuna saqqummiutissavakka.

2025-mut naatsorsuutit Namminersorlutik Oqartussat kukkunersiuisuinit avataaneersunit nangaanartortaqqanngitsumik oqaaseqarfigineqarput, erseqqissaassuteqarfigineqanngillat sakkortuumilluunniit isornartorsiorneqarnatik.

Nunatta Karsiata Naatsorsuutai 2025-mi ingerlatsinermi, sanaartornermi taarsigassarsisitsinermilu; IST-mik taaneqartartumi 126 mio. kr.-nik ilassutitut aningaasaliissutit ilanngullugit 101 mio. kr.-nik amigartoorfiupput. Tassa amigartoorutini nikingassutaasut 25 mio. kr.-nik pitsaanerupput.

Ingerlatsinermi sanaartornermilu angusat, IS-imi angusanik taaneqartut, kisiisa naatsorsoraanni naatsorsuutit 109 mio. kr.-nik amigartoorfiupput, ilassutitut aningaasaliissutit ilanngullugit 134 mio. kr.-nik amigartoorinissaq missingersuutigineqarsimasoq. Taamatuttaaq amigartoorutini nikingassutaasut 25 mio. kr.-nik pitsaanerupput.

Nunatta Karsiata isertitai aningaasanut inatsimmi tamatumalu kingorna ilassutitut aningaasaliissutini naatsorsuutigisanut sanilliullugu 58 mio. kr.-nik qaffasinnerunerat angusani ersippoq. Soraarnerussutisiassanut akileraarutinit aamma aalisarnermi isumalluutunik atuinermut akitsuutinit kiisalu ingerlatseqatigiiffiit akileraarutaannit isertitat qaffasinnerunerat nikingassuteqarnermi pingaarnertut pissutaapput. Taamaattorli EU-mik suleqatigiinnissamik isumaqatigiissummit isertitat ikinnerunerat aamma ingerlatseqatigiiffinit Namminersorlutik Oqartussanit pigineqartunit iluanaarutit pissarsiarineqartut ikinnerusimanagerat pitsaanngitsumik sunniuteqarput.

Tamatuma peqatigisaanik ingerlatsinermut aningaasaliissutissatut, aningaasaliissutitut inatsisitigut pisussaaffigisanut, ilassutitut aningaasaliissutissatut aamma sanaartornermut aningaasaliissutissatut missingersuutigineqarsimasunut ataatsimut aningaasaliissutit 33 mio. kr.-nik qaffasinnerupput. Pingaarnertut aningaasaliissutit inatsisitigut pisussaaffigisat aningaasartuuteqarnernermi pissutaapput, tassani aningaasanut inatsimmi tamatumalu kingorna ilassutitut aningaasaliissutini naatsorsuutigisanut sanilliullugu sulinermut ilanngaatinut, utoqqalinermilu pensionisianut aningaasartuutit qaffasinnerupput.

Angusat missingersuutigineqarsimasunit pitsaanerugaluartut – aningaasaliissutini inatsisitigut pisussaaffigisani aningaasartuutit qaffannerannit isertitallu allanngorarnerannit erseqqippoq - politikkikkut pingaarnersiuinissamut aamma mianersortumik aningaasaqarnermik aqutsinissamik annertuumik piumasaaqateqarfiusoq. Taamaammat maannamit akisussaassuseqartumik aningaasanik aqutsinissaq Naalakkersuisunit pingaartinneqarpoq, tassani atugarissaarnermut aningaasartuutit inuiaqatigiillu ineriartornerannut aningaasaliinerit akornanni oqimaaqatigiissaarisooqassaaq aamma Nunatta Karsiata siuinissamut ungasinnerusumut attanneqarsinnaanerata eqqarsaatigineqassaaq. Nunatsinni patajaatumik ineriartornissamut pitsaasumik aningaasanik aqutsinissaq tunngaviuvoq.

Nunatta Karsiata 2025-mut Naatsorsuutaasa akuersissutigineqarnissaannut siunnersuutip Kukkunersiuinermut Ataatsimiititaliamut suliarineqartussanngorlugu innersuunneqarnissaa siunnersuutigineqarpoq.

Kukkunersiuinermut Ataatsimiititaliaq Inatsisartut assigalugit naatsorsuutit saniatigut kukkunersiuinermut nalunaarummik kukkunersiuisut avataaneersut suliaannik tigusaqarpoq. Naalakkersuisut ukiut siulii assigalugit, ataatsimiititaliap kukkunersiuinermut nalunaarummi oqaaseqaatigineqartut pillugit apeqqutigisinnaasai allakkatigut akissavaat, taamaalilluni taakku ataatsimiititaliap isumaliutissiissutissaanut ilanngunneqarsinnaaqqullugit.

Naalakkersuisut Nunatta Karsiata 2025-mut naatsorsuutai pillugit Kukkunersiuinermut Ataatsimiititaliamik oqaloqateqarnissartik qilanaaraat, ataatsimiititaliallu sulilluarnissaanik kissaallugu.

Taama oqaaseqarlunga Naalakkersuisut sinnerlugit Nunatta Karsiata 2025-mut naatsorsuutai Inatsisartunut suliaannngortippakka.